

玉

海

十

玉海卷第十八

浚儀王應麟伯厚甫之章

地理

郡國

漢中興郡國

下

後郡國志漢書地理志記天下郡縣本末及山川奇異風俗所由至矣今但錄中興以來郡縣改異及春秋三史會同征伐地名以爲郡國志凡前志有縣名今所不載者皆世祖所并省也前無今有者後所置也凡縣名先書者郡所治也漢承秦三十六郡至于

孝平凡郡國百三縣邑道侯國千五百八十七世祖

中興惟官多役煩乃命合并省郡國十縣邑道侯國

四百餘所

中興海內人民纔什二三建武二十一年遣中郎馬援謁者分築烽候堡壁稍興立

郡縣十餘萬戶或空置令長上至明帝置郡一章帝笑如春秋素王乃建三營屯田

置郡國二和帝置三安帝又命屬國別領比郡者六

又所省縣漸復分置至于孝順凡郡國百五縣邑道

侯國千一百八十

注東觀書曰永興元年鄉三千六百八十二亭萬二千四百四十三

民戶九百六十九萬八千六百三十口四千九百一

十五萬二百二十以河南言之二十一城比前則

無故市焉以河東言之二十城比前則無左邑長脩

四邑又更薺城之名焉以弘農言之比前無商析四邑而湖與華陰乃自京兆割隸焉京兆舊十二城而省其二馮翊舊二十四而存其十三右扶風舊二十一而廢其六邑此屬司隸者也潁川省西京之三縣梁國增西京之一城沛二十一城以前志則省其十六陳九城比前淮陽則仍其舊魏郡十五城省前史之三鉅鹿十五城省前史之五常山改鄆爲高邑而并五邑焉中山更漢昌蒲陰而并一邑焉改信都爲安平而邑省其四改清河爲甘陵而邑省其七河間復於永元而邑增舊之七趙國加以中丘而邑增舊

之一勃海止於八城而省舊之十八此屬豫冀者也
東郡則省范荏平之七邑東平則改屬壽張須昌寧
陽之三邑而分三邑爲任城泰山十二城比前省其
半山陽十城比前省其十三濟北并泰山而復分於
永元下邳舊臨淮而更名於永平濟陰之邑增前志
之二彭城之邑增前志之一東海之縣省前志之二
十五琅邪之縣省前志之三十八廣陵兼泗水之城
則又增前志之七此屬兗徐者也以青荆二部攷之
若濟南省四城平原省十城樂安易千乘之號而邑
并其六北海兼三國之疆而邑并其八東萊缺其四

邑齊國虛其六城南郡邑減其一南陽零陵武陵邑
增其一以揚益二部攷之廬江兼六安而增二城會
稽分吳郡而省十二城九江牂柯越雋并省皆一邑
豫章巴郡漢中增損皆三邑益州省七城而分爲昌
郡犍爲廣漢蜀郡共省九邑而分爲屬國以涼并幽
交四部攷之若天水省三城而改漢陽張掖省二城
遼東省七城而分屬國及上黨鬱林之一邑武都九
真之二邑金城漁陽之三邑朔方之四邑大原之五
邑定襄代上谷樂良之七邑遼西之九邑上郡右北
平之十二城安定北地之十三城涿郡之省者二十

二西河之省者二十三皆損於前者也廣陽南海之
增一邑元菟之增三邑武威之增四邑及蒼梧之置
郭平交趾之置封谿望海皆增於舊者也先是中興
六載六月辛卯令郡國不足置者上二府於是條素
併省四百餘縣而建武十一年并朔方於并州十二
年省金城屬隴西又其明年省并西京十三國今以
志考之屬司隸之部郡七縣邑侯國百六豫州部郡
國六縣邑侯國九十九冀州部郡國九縣邑侯國百
其餘若兗若徐若青若荆暨揚益涼并幽交其部郡
國凡七十七而屬國六不與其數共八十三而縣邑

侯國道凡七百六十蓋自明帝置一章帝置二和帝
置三安帝又命屬國別領比郡六又所省縣漸復分
置至于孝順凡郡國百五比前史反增二縣邑道侯
國千一百八十比前史猶少三百九十七

漢中興郡縣改異 并省 又見上

志錄中興以來郡縣改異凡前志有縣名今不載者
皆世祖所并省也并合省郡國十縣邑道侯國四百
餘所 紀建武六年六月辛卯詔曰張官置吏所以
爲人也今戶口耗少吏職尚煩其令司隸州牧各實
所部省減吏員縣國不足置長吏可并合者上大

司徒大司空二府於是條奏并省四百餘縣十年省

定襄郡十一年省朔方牧并并州十二年省金城郡

復置十三年二月并省西京十三國廣平真定城陽泗水菑川

膠東六安廣陽河閒注此有九國云十三國誤也二十年省五原郡百官

志世祖并省郡縣四百餘所後世稍復增之晉志

光武郡國并省者八城陽菑川高密膠東六安真定泗水廣陽一本云郡國志注

所省者十國後復河閒廣陽郡省八國耳宋志東京無復朔方改交陟

曰交州凡十二州司隸所部如故郡縣改異省都

尉并太守則建武六年河南改爲尹則十五年州牧

復爲刺史則十八年湖華陰故屬京兆今屬弘農長

陵陽陵商雒故屬馮翊弘農今屬京兆建武十五年也陳留山陽三縣屬梁國元和元年也建武十一年十月西河上郡屬魏二十七年七月代郡魯國屬幽豫皆改屬者也汝南東平之固始壽張常山會稽南陽之高邑章安章陵則世祖之所改臨淮爲下邳天水爲漢陽則永平十五年十七年之所更章帝改楚爲彭城又改中山之三縣陳留之考城章和二年改淮陽爲陳元利元年分東平爲任城永元七年延光建和二年改千乘爲樂安樂成清河爲安平甘陵陽嘉三年改武陵之漢壽皆更名者也省六安屬廬江

省廣平眞定菑川高密膠東屬鉅鹿常山北海則建武十年及十三年也省河間屬信都至永元三年而復省廣陽屬上谷至永平八年而復以至城陽泗水之屬琅邪廣陵皆并省而分屬者也交阯之封谿望海武陵之沅南置于建武十九年二十六年分益州置永昌郡分泰山置濟北見于永平之十二年永元之二年順帝分會稽置吳郡永元二年八年十六年永和初元之置充國臨汝建昌漢寧永平元年三年八年之復郡邵陽武功建初四年五年永和二年延光元年三年之置輪氏復犢榆杜陽陽信汶江以至

部平哀牢博南之置殺裒栗邑淳于昌安下密之復
厭次林慮臨濟臨睢樂平蒲陰湖陸高平漢嘉漢昌
之改未易悉數中平五年改刺史新置牧六年置漢
安郡初平六年分巴郡爲二建安十三年房陵別屬
新城十八年復禹九州二十年復置漢寧上庸郡則
漢季矣

漢置永昌郡

又見內附類

明紀永平十二年春正月益州徼外夷哀牢王相率
內屬於是置永昌郡罷益州西部都尉注西南夷傳
曰罷益州西部所領六縣合爲永昌郡置哀牢博南

二縣去洛陽七十里 志永昌郡八城戶二十三萬
一千八百九十七口百八十九萬七千三百四十四
哀牢夷傳始通博南山度蘭倉水行者歌曰漢德
廣開不賓度博南越蘭津

漢郡邑侯國總八郡縣本末

續志凡郡國百五縣邑道侯國千一百八十 自河
南至扶風郡七而縣邑侯國百六則屬之司隸自潁
川至魯國郡六而縣邑侯國九十九則屬之豫自魏
郡至渤海郡九而縣邑侯國百則屬之冀自陳至濟
陰郡八縣邑侯國八十則屬之兗徐州則自東海至

下邳郡五而縣邑侯國六十二焉青州則自濟南至
齊國郡六而縣六十五焉荊州則自南陽至長沙郡
七而縣邑侯國百十七焉揚州有六郡而縣邑侯國
九十二焉益州則郡國十二而縣道百一十八涼州
則郡國十二而縣道侯官九十八并州之郡九而縣
邑侯國九十八幽州之郡國十一而縣邑侯國九十
交州之郡七而縣五十六

漢春秋三史地名

續志錄春秋三史會同征伐地名注臣昭案志猶有
遺闕今眾書所載不可悉記其春秋土地通儒所據

而未備者皆先列焉山川地名悉爲細注今進爲大

字今以河南一郡考之如河南謂之王城尸鄉謂

之尸氏密謂之新城則考之春秋者也如狄泉唐褚

氏東園解乾祭垂隴扈蒯原圃萊林制瑣清訾旃然

汜京谿泉則攷之左氏者也若公羊之成周史記之

程注長城巨雍陽武什谷成畢陘山愚狐高都前書

之曲遇劉昭補注於河南郡

引左傳者三十八若大野澤觀魚臺丹徒之引春秋

樂出沙鹿之引公穀不可勝紀所證他書若爾雅詩

書說文帝王世紀鄭志越絕古史考皇覽劉向別錄

古今注及呂氏漢晉魏氏交廣春秋黃圖決錄計偕
簿汝冢書襄陽耆舊傳西征南都三都賦注以記名
者三齊三秦上黨荊州秦州營陽始安伏滔北征戴
延之西征潘岳關中劉薈騶山晉太康元康地道周
處風土千寶搜神慧遠廬山任豫益州及博物耆舊
豫章交州巴吳興湘中等書以志名者巴漢南中華
陽陳留及廣志 河內之修武春秋曰甯潁川之臨
陵春秋曰隰汝南之城父春秋曰夷陳之苦縣春秋
曰相東郡濮陽春秋曰濮穀城春秋曰小穀東平之
壽張春秋曰良山陽之東緡春秋曰緡東海之祝其

春秋曰夾谷琅邪之卽邱春秋曰祝邱廣陵之堂邑

春秋曰堂良成春秋曰良平原之祝阿春秋曰祝柯

漢中之錫春秋曰錫穴皆見志之本注 春秋正義

引釋例土地名世族譜 隋志春秋土地名三卷裴晉

秀客京相璠撰九州郡縣名九卷古來國名二卷古今地譜

二卷 唐志劉伯莊史記地名二十卷 杜預左傳

序別集諸例及地名譜第曆數相與爲部凡四十部

十五卷名曰釋例 宋州郡志以班固馬彪二志太

康元康定戶王隱地道晉世起居永初郡國何徐州

郡及地理雜書互相考覆以續漢郡國校太康地志